

Juez Mr. Mohammed

GOBIERNO MESTER BIN CU UN SOLUCION INMEDIATO PA E CRIMINALIDAD DEN HUBENTUD CU TA ALARMANTE

No tin tempo pa perde mas, mester actua awor



ORANJESTAD(AAN) -- Den un entrevista exclusivo cu Juez mr. Mohamed el a expresa kico realmente ta su preocupacion durante e añanan cu e ta trahando como Juez.

E preocupacion cu mr. Mohamed tin, ta e situacion alarmante cu ta reina den hubentud pa loke ta trata criminalidad y droga.

DIARIO por a constata con durante tratamiento di casonan caminda hobennan ta presenta dilanti mesa berde pa ladronicia, mr. Mohamed ta expresa su preocupacion y ta haña atencion di e acusado cu loke e ta haciendo no ta bon.

NO TIN LUGAR PA RE-EDUCA MUCHANAN CU A COGE MAL CAMINDA

Mr. Mohamed a splica DIARIO cu aña pasa den luna di November e mester a reemplaza e Juez Comisario. Mr. Mohamed a atende un caso di 3 hoben, uno di 13, e otro di 14 y e ultimo di 15 aña, kendenan den horanan di madrugada a drenta un lugar di huur y a bay algun motocicleta.

Ley ta bisa cu un mucha entre 12 y 14 aña no por ser castigado. Loke Juez por haci ta

duna nan un scual y despues entrege na su mayornan.

Segun ley, muchanan entre 15 y 16 aña por duna un multa pero no un castigo di prison. Muchanan di 17 aña pa ariba por worde encarcela pero dependiente di e caso.

Pa loke ta trata e caso di e trio, mr. Mohamed a splica cu nan a jura cu ta e ultimo biaha cu nan lo presenta dilanti mesa berde. Mr. Mohamed a duna nan un chance y a laga nan bay.

Dos siman despues mr. Mohamed mester a bolbe reemplaza e Juez Comisario kende mester a bay haci un investigacion na Venezuela.

Pa su sorpresa dos di e muchanan atrobe ta cera. A resulta cu atrobe den horanan di madrugada nan tabata ariba caya caminda nan a kibra y horta.

Mr. Mohamed a indica cu si e impone un multa ta e mayornan mester paga. Si bolbe scual nan, esaki no tin efecto. Mr. Mohamed a indica cu e tambe tin yiu y casonan asina ta preocupe.

Tin mayornan cu no por controla nan yiu y nan yiu ta cana den horanan di madrugada ariba caminda.

E pregunta grandi ta: "Kico por haci". Mr. Mohamed a indica cu hopi partido politico den campaña ta presenta hopi

cos pa cu hubentud. Pero si mira e programa di awor y esun di 12 aña di e partidonan politico, tur tin e mesun cos pa traha pa hubentud. Kico realmente ta worde haci, practicamente nada.

CONVERTI UN DI E HOTELNAN DEN UN INSTITUCION

El a muestra cu no mester di leyman pa drecha e situacion. Tin leyman caba. Tin ley cu ta bisa cu e acusado por worde poni na disposicion di Gobierno, caminda e mucha ta worde interna den un institucion of fundacion pa reeduca e mucha.

Notable ta cu e ley tey y ta duna posibilidad di actua, pero lamentablemente no tin un lugar pa esey. Curaçao tin lugar pero nan ta completamente yen y despues di e Status Aparte e situacion a bira dificil y no tin lugar pa e muchanan di Aruba.

Tabata ser papia cu e prison bieu lo worde renova pa bin cu algo den e sentido aki, pero te ainda nada.

Mr. Mohamed a indica cu tin masha hopi mas entre otro e caso di e pandiya di Noord caminda un cantidad di menor di edad tabata involvi.

Mr. Mohamed a indica cu ta existi e posibilidad cu Voogdijraad por haci un peticion

na Corte pa saca un mucha for di cas di su mayornan y laga un otro persona of famia tume y eduke. Esaki ta un proceso cu ta tuma hopi tempo y no ta worde usa cu frecuencia.

Aruba ta conta cu Imelda Hof pero net ora cu e hoben mester haya e guia necesario, e mester bandona Imelda Hof.

Mr. Mohamed ta kere cu por bien renova un di e hotelnan para y dividi esaki pa muchanan baldadi y un otro seccion caminda ta trata e hobennan drogadicto.

Ta asina cu net esnan cu ta ariba caya anochi, ta esnan cu ta cay den tentacion di droga. Mr. Mohamed a menciona como un ehempel un caso caminda un hoben den Corte a dicidi di basha abao un cantidad di roba pa asina cuminsa un bida nobo.

A keda palabra cu e hoben aki lo haya un tratamiento na Paaz. Notable ta cu tempo cu e hoben mester a worde interna el a worde poni den libertad. A resulta cu medico di Paaz a indica cu Paaz no ta e lugar pa trata drogadicto.

CON PA COMBATI DROGA

Segun mr. Mohamed, e unico manera pa combati droga ta ataca na tres parti.

1. Educacion preventivo.

Na kleuterschool caba mester muestra e muchanan cu droga ta malo. Esaki ta pa evita di crea comprador. Si no tin comprador, e bendedor di droga no tin mercado.

2. E parti Curativo. Mester tin un lugar pa yuda esnan cu kier sali for droga.


3. E parti Represivo. Mester detene y encarcela e narcotraficantenan.

Mr. Mohamed a indica cu door di cera hende so bo no ta yega na nada. Ta asina cu hopi di esnan cu ta worde encarcela, ta worde mal influencia pa otronan na KIA.

Como Juez ora bo mira cu un persona ta blo presenta dilanti mesa berde, esaki ta ponebo sinti malo ya cu e trabao di Corte ta inutil, esta cu e castigo di prison no ta trece cambio den e persona.

Mr. Mohamed ta cere cu pueblo y Gobierno mester bay studia e problema serio aki y bin cu un solucion caminda ta impone medidanan temporario. A lo largo lo studia con lo actua pa futuro.

No mester ta asina cu awor ta core traha un comision pa laga traha un rapport. Despues e rapport aki ta keda para basta aña. Awor loke mester haci ta bin cu un solucion y cuminsa actua promer cu e situacion na Aruba no tin solucion mas.



Unique Creations

Costura via medida di uniform, paña pa damas y caballero, a muda pa

Paradijswijk 106,

Tel: 26360

orario 9-10 y 2-7pm